

# BELEID TEN OPSIGTE VAN DIE HANTERING VAN SWANGERSKAPPE VAN LEERDERS IN DIE HOËRSKOOL GRENS.

Die Hoërskool Grens te Oos-Londen en sy beheerliggaam erken die Grondwet van die Republiek van Suid-Afrika, Wet 108 van 1996 (hierna 'die Grondwet'); die SuidAfrikaanse Skolewet, Wet 84 van 1996 (hierna 'die Skolewet'), sowel as alle toepaslike, afdwingbare departementele regulasies en beleid, wat insluit die Leerderaanwesigheidsbeleid wat ingevolge **Algemene Kennisgewing 361 van 2010, GG 33150 4 Mei 2010**, uitgevaardig is (hierna 'die Leerderaanwesigheidsbeleid'). Al voormelde is in ag geneem met die opstel van hierdie swangerskapbeleid.

## 1. Inleiding

1.1 Die skool:

1.1.1 erken die verantwoordelikheid en invloed van die SuidAfrikaanse onderwysstelsel ten opsigte van leerderswangerskappe; en

1.1.2 aanvaar sy verantwoordelikheid om al sy leerders van hulle reg op onderrig in kennis te stel.

## 2. Beleidsstelling en algemene beginsels

2.1 Die skool is 'n sterk voorstander van seksuele onthouding onder leerders van die skool.

2.2 Tog sal die skool ooreenkomstig die bepalings van die Grondwet en die Skolewet nie onbillik teen swanger leerders diskrimineer nie.

2.3 Met hierdie beleid word geen leerder geskors of permanent uitgesit nie, maar verseker dat leerders verantwoordelikheid vir hul dade aanvaar en ingeligte keuses maak.

### **3. Hantering van swangerskappe onder skooldogters**

3.1 Enige leerderswangerskap sal vertroulik hanteer word.

3.2 Elke geval behoort deurlopend beoordeel te word ten einde die leerder se opvoedingsbelange en reg op onderrig te beskerm, behoudens die bepalinge van hierdie swangerskapbeleid.

3.3 Indien 'n leerder haar swangerskap aan 'n ander personeellid as die hoof bevestig het, is dit die betrokke personeellid se plig om die skoolhoof onmiddellik in kennis te stel.

3.4 Die skoolhoof en 'n gedelegeerde senior vrouepersoneellid moet met die leerder en/of haar ouers/voogde oorleg pleeg in geval van 'n redelike vermoede dat sodanige leerder swanger is sonder dat die skool formeel daarvan ingelig is.

3.5 Alle reëlins en bepalinge ten opsigte van die swangerskapbeleid geld vir dogters in alle grade.

3.6 Dit is die skool se verantwoordelikheid om 'n register van leerderswangerskappe by te hou.

3.7 Die skoolhoof moet toesien dat 'n afskrif van hierdie beleid oor leerderswangerskap aan die swanger leerder en/of haar ouers/voogde oorhandig word.

#### **4. Die leerder se verantwoordelikheid**

4.1 'n Swanger leerder of 'n leerder wat rede het om te glo dat sy swanger is, moet dit met die skoolhoof of enige ander personeellid bespreek om sodoende leiding te kry.

4.2 'n Leerder wat bewus is van 'n medeleerder se swangerskap moet die skool onmiddellik daarvan in kennis stel.

4.2 Sodra die skool van 'n leerder se swangerskap ingelig is, moet die skoolhoof en sy gedelegeerde senior vrouepersoneellid met die betrokke leerder en/of haar ouers/voogde oorleg pleeg.

4.3 Indien dit nie moontlik is om met die ouers/voogde van die swanger leerder oorleg te pleeg nie, mag die skool die leerder na 'n geneesheer of mediese sentrum (met ander woorde kliniek of hospitaal) verwys. Die geneesheer of professionele gesondheidspraktisyn moet die skool van 'n bewys van die leerder se swangerskap voorsien, wat die geraamde bevallingsdatum sal insluit

4.4 Die swanger leerder moet behoorlik ingelig word dat daar geen mediese personeel by die skool is nie en dat geen personeellede van die skool professioneel opgelei is om enige komplikasies gedurende 'n swangerskap te hanteer nie. Die leerder moet voorts kennis neem van moontlike

gesondheidsrisiko's, trauma vir haar en/of haar ongebore of pasgebore kind asook van die moontlikheid dat sommige lede van die skoolgemeenskap nie noodwendig haar situasie sal aanvaar óf haar sal ondersteun nie as gevolg van die bepaalde waardestelsel wat die gemeenskap aanhang.

4.5 'n Swanger leerder moet vanaf die begin van week 32 van haar swangerskap met swangerskapverlof gaan en nie meer aan gewone skoolaktiwiteite en/of -klasse deelneem nie. Met hierdie maatreël wil die skool verseker dat die leerder in 'n veilige omgewing aan haar kind geboorte kan skenk terwyl dit ook die ander leerders van die skool beskerm.

4.6 Indien die skool nie oor voldoende kennis van die gevorderdheid van die leerder se swangerskap beskik nie en daar 'n redelike vermoede bestaan dat sy reeds 32 weke swanger is, moet die skoolhoof of sy gedelegeerde senior vrouepersoneel die bepalings in paragraaf 4.5 hierbo afdwing. Dit berus by die swanger leerder om die skool by wyse van 'n mediese sertifikaat van 'n erkende mediese praktisyn anders te oortuig.

4.7 Afhangende van bogenoemde sal bepaal word of 'n leerder toegelaat word om enige eksamens van die skool af te lê. Die stelsel van kontinue evaluering vereis dat 'n leerder voltyds in die klaskamer moet wees. In sommige gevalle mag met goedkeuring van die beheerliggaam van hierdie reël afgewyk word.

4.8 Indien die tydperk vanaf 32 weke swangerskap tot die bevalling in 'n jaareindeksamen val, sal die skool die swanger leerder so ver moontlik probeer bystaan om wél haar eksamen af te lê met dien voorstande dat die

leerder op haar eie onder behoorlike toesig kragtens alle departemente voorskrifte die eksamen aflê.

4.9 Indien die tydperk vanaf 32 weke swangerskap tot die bevallingsdatum in die swanger leerder se graad 12-eindeksamen val, sal die skoolhoof of sy gedelegeerde senior vrouepersoneellid die leerder en/of haar ouers/voogde die moontlikheid bied om vrywillig as leerder van die skool te deregistreer en die eindeksamen as 'n privaat kandidaat af te lê.

4.10 Indien die swanger leerder wél die eksamen by die skool skryf, moet die leerder en/of haar ouers/voogde versoek word om voldoende reëlings te tref dat behoorlike mediese hulp onmiddellik beskikbaar is indien die leerder en/of haar ongebore baba dit sou benodig.

4.11 Wanneer die leerder haar gewone skoolklasse en -aktiwiteite ná die geboorte van haar kind hervat het, mag die skoolhoof of sy gedelegeerde senior vrouepersoneellid na gelang van omstandighede by die leerder oor die versorging en welstand van die baba navraag doen.

4.12 Indien die leerder en/of haar ouers onderneem om die baba self groot te maak mag die baba op geen stadium die moeder na enige aktiwiteit van die skool vergesel nie.

## **5. Ouers en voogde se verantwoordelikheid**

5.1 Dit is die plig en verantwoordelikheid van die ouer van 'n leerder wat swanger is om dit onmiddellik onder die aandag van die skoolhoof te bring.

5.2 Die ouers/voogde van die swanger leerder sal versoek word om die leiding te neem en met die skool saam te werk ten einde die leerder te ondersteun en haar gesondheid en vordering te monitor.

5.3 Die ouers/voogde van die swanger leerder sal versoek word om stappe te doen om te verseker dat die leerder haar klastake, -opdragte en werkstukke ontvang indien sy weens haar swangerskap skool nie kan bywoon nie en dat voltooid take en werkstukke vir assessering aan die skool terugbesorg word.

## **6. Ondertekening van die swangerskapbeleid**

6.1 Deur die ondertekening van hierdie swangerskapbeleid:

6.1.1 aanvaar die swanger leerder sowel as haar ouers/voogde dat die skool 'n opvoedkundige instelling is en nie noodwendig oor die nodige kundigheid, fasiliteite en ander hulpbronne beskik om mediese, sielkundige en/of ander dienste wat met 'n swangerskap verband hou, te verskaf nie; en

6.1.2 vrywaar die swanger leerder sowel as haar ouers/voogde die beheerliggaam én die skool onherroeplik teen die instel van enige aksie vir enige skade van watter aard of op watter grond ook al wat met die leerder se swangerskap en/of bevalling verband hou. Hierdie vrywaring sal 'n aanvang neem op die datum waarop die leerder swanger geraak het en sal voortduur totdat sy haar gewone skoolaktiwiteite ná die bevalling hervat.

**ONDERTEKENING VAN DIE SWANGERSKAPBELEID DEUR LEERDER EN  
OUERS/VOOGDE**

Hiermee erken ek/ons dat bostaande swangerskapbeleid op

\_\_\_\_\_ volledig in oorleg met en by die Hoërskool  
Grens met my/ons bespreek is, en dat ek/ons 'n afskrif daarvan ontvang het. Ek/ons  
erken voorts dat ek/ons op hoogte is van die inhoud van bygaande  
swangerskapbeleid en dat ons daarmee akkoord gaan.

\_\_\_\_\_  
LEERDER (Volle naam & handtekening) DATUM

\_\_\_\_\_  
OUER/VOOG (Volle naam & handtekening) DATUM

\_\_\_\_\_  
OUER/VOOG (Volle naam & handtekening) DATUM